

JESSI VIERTS A GNOVIS PROSPETIVIS

Fint ore o vin fat un discors dome «clericâl»,
valit ancjemò cualchi an ma za in viaç par jessi superât.
Che al sedi il predi a fâ lâ indenant la religion
e je une robe ancjemò di dimostrâ.

Partant (e no dome pe scjarsitât di clero!) al è just preparâ
e preparâsi a gnovis formis pastorâls, simpri mancul clericâls
e simpri plui viertis ai nestrîs fradis batiâts.

Si podarès, pal moment, scomençâ a afidâ lis parochis ai laics,
completamentri, cun tant di «investidure», lassant pal predi
dome il servizi sacramentâl, cu la sperance che finalmentri
si puedi viodi i gnûfs predis, saltâts fûr dal lôr paîs
e sielts de lôr int, cun tant di famee su pe schene e impegnâts
a la pâd di nô tal comit de evangelizazion.

No stin a fâ un dogme di ce che o vin metût sù dibessôi!

Antoni Beline
riflessions di un predi cjargnel

7
GLESIE FURLANE
RISULTIVIS - OPERA OMNIA - 4

GLESIE FURLANE
RISULTIVIS



riflessions di un predi cjargnel

Antoni Beline



GLESIE FURLANE

Vie Zara, 10

33030 - Vilegnove di San Denêl

www.glesiefurlane.org

ISBN 978-88-6064-046-8



Jentrade

Ai 29 di setembar dal 1974 - fieste di San Michêl, pre Antoni al finive di bati a machine 33 sfueis: sul devant di chest pacut di cjartis, a mût di cuviertine, al veve scrit a man "*Per chi vuol sentire... Riflessioni Pastoralis di un Curato di montagna... dopo cena*". Al jere passât a pene un mêis di chê date emblematiche e fatidiche dai 28 di avost cuant che a San Pieri di Cjargne un trop di predis a vevin lassât sul altâr un document "*Predis cjargnei pal lôr popul*", là che a contestavin il fat che ur vignîs dineât il dirit fundamentâl e naturâl di doprâ la lenghe dal popul ancje te celebrazion de liturgjie. Azion di proteste che e à lassade interdete la gjerarchie, che no si spietave une azion cussì clamorose, ma che e à cjatade ancje pocje udience e risonance su la stampe di chê volte e tes analisis e studis su la nestre glesie de bande dai storics e ricercjadôrs nostrans di vuê. Tignude tal cidin, cun dut che e je stade un fat ecezionâl e vonde râr te Glesie catoliche. Cui media di vuê sigûr no sarès passade cussì slisse. Ma si pues scrupulâ che vuê nol sucedarès un fat dal gjenar, parcè che ancje il predessam di cumò al è gambiât: si è invectât, al è plui rassegnât e lis pocjis fuarcis zovinis a son cetant plui dumiestiis.

Dal 1975 lis stessis Riflessions pre Antoni lis à voltadis par furlan e publicadis sul opusculut GLEISIE FURLANE, te golaine "*Cjargnei cence dius*". A jerin i prins scrits che pre Antoni al meteve jù.

Di chê volte a son passâts 35 agns! Come timp, al podarès semeâ jêr. In veretât al è gambiât il mont, la societât, la vite, la glesie.

Pe nestre glesie il 1975 al jere stât l'an de straordinarie semlee dai predis. Il predessam al jere ancjemò numerôs e vitâl a rispjet di cumò che la situazion e je precipitade. I predis in chescj agns a son calâts in maniere esponenziâl, che un slac di paîs ormai a son cence cheste figure che par secui e jere presint e determinant fin tai paisuts plui fûr di man. Su la sente di Ermacure a son passâts 3 vescui e su la sente di Pieri 4 papis.

Ma il mont al è gambiât ancje dal pont di viste sociâl, economic, pulitic tant locâl (teremot, spopolament dai paîs, de emigrazion a une fuarte inmigrazion, economie che e clope, puescj di vore a riscjo), che internazionâl (sdrumât il mûr di Berlin, cu lis ideologjiiis ladis in sfas, globalizazion, mieçs di comunicazion simpri plui sofisticâts e a puartade di man di ducj, omologazion gjeneralizade cun nivelaments e impuariments di ogni gjenar tant economics che culturâi...) ... e si podarès continuâ.

Di sigûr cumò al è un altri mont!

Distès o crôt che il librut di pre Antoni che o publichìn te version furlane e ta chê origjinâl taliane, cuntune grampute di articuluts sul stes argument come zonte, nol à pierdût il so valôr tant in certis analisis che al faseve, che tai tentatîfs di soluzion che al proponeve. Tentatîfs di soluzion, parcè che tune situazion balarine come chê che o vivìn si pues dome provâ, tentâ progjets cun libertât e inteligjence. No si puès pretindi di vê recipis preconfezionadis e validis par dut.

Leint chestis pagjinis si à di cirî il spirt che al sta sot e ch'al à animât lis riflessions di pre Antoni, alore si puès rigjavâ ancjemò pal dî di vuê alc di bon e di sostanziôs cun dut che la realtât si è ribaltade.

Cuant che al veve batût a machine chescj sfueis pre Antoni al veve a pene 33 agns e al faseve il plevan a Rualp e Val di 6 agns: zovin di etât e zovin di esperience.

Ma culî si cjate za dute l'anime, dute la fede, dute la passion di chest profete che al veve in cualchi maniere segnât ormai il so percors, la strade che al veve di fâ. Al cjalave za indenant, al veve scuvierte un'altre volte la sô vocazion: par ce troi che il Signôr lu clamave, ce segnâl che al varès vût di jessi pal so popul.

E pre Antoni nol à molât un lamp, nol à vût un atim di esitazion. Par dute la sô vite al à corût pal stes troi, ancje se il percors si faseve intrigât e dâr, se lis intemperiiis de salût o dai podês e des gjerarchiis lu sfidavin e lu tormentavin: lui nol à mai molât. Come ducj i profetis al è stât fedêl a se stes ancje se i costave salât, parcè che al à savût restâ fedêl a Diu e al so popul.

Lis *Riflessions di un predi cjargnel*, a son stadis scritis che il vescul Alfredo Battisti al jere di pôc rivât in Diocesi. Lis riproponin cumò che un gnûf vescul al è rivât di pôc a Udin, bons Andrea Bruno Mazzocato. Stant che il test al jere nassût par talian e voltât dal autôr stes ancje par furlan, o publichin dutis dôs lis versions. Cussì o sin contents che ancje il gnûf vescul al vedi mût di lei chestis pagjinis e di cognossi, almancul un freghenin, un predi, fi dal Friûl e de Glesie di Aquilee, che al à lassât e al lassarà a dilunc il segno de sô presince te storie de nestre Glesie e dal nestri popul.

Vilegnove, ai 2 di dicembar 2009, fieste di San Cromazi

pre Roman Michelotti